

INUIT ATAQATIGIIT

INATSISARTUNI



UPA2015/41+42

17. april 2015

Juliane Henningsen

Inatsisartunut ilaasortat ulloq taanna Inatsisartunut qinerneqarnerminniit (ulloq qinersivik) aatsaat akissarsiaqartalernissaat pillugu Inatsisartuni Naalakkersuisunilu il. il. ilaasortat aningaasarsiaqartitaanerat il. il. pillugit Inatsisartut inatsisissaani nr. 22-mi, 18. december 2003-meersumi (Aningaasarsiat pillugit Inatsit) § 2 imm. 1-p allanngortinnissaanut siunnersuuteqaqqullugit Naalakkersuisut peqquneqarnissaannik Inatsisartut aalajangiiffigisassaattut siunnersuut.

Inatsisartuni Naalakkersuisunilu il. il. ilaasortat aningaasarsiaqartitaanerat il. il. pillugit Inatsisartut inatsisissaani nr. 22-mi, 18. december 2003-meersup (akissarsiaqarnermut Inatsit) imatut allanngortinnissaanut siunnersuuteqaqqullugit Naalakkersuisut peqquneqarnissaannik Inatsisartut aalajangiiffigisassaattut siunnersuut:

- 1. Naalakkersuisuni Inatsisartuniluunniit ilaasortaasimasut sivisunerpaamik ilaasortaajunnaarnersiaqarsinnaatitaanerat apparneqassaaq qaammatini aqqaneq-marlunniit qaammatinut arfinilinnut.**
- 2. Inatsisartuni Naalakkersuisuniluunniit ilaasortat ukiup atuuffiusup ataatsip allartinnerani ilaasortaajunnaarnersiutisiassaat qaammammik ataatsimik ilaneqartassapput.**
- 3. Ilaasortaajunnaarnersiutisiaqarnissap sivikinnerpaaffia maannakkut qaammatinik pingasunik sivisussuseqartoq qaammammut ataatsimut apparneqassaaq.**

(Inatsisartunut ilaasortaq Randi Vestergaard Evaldsen, Demokraatit)

Demokraatit siunnersuutaat marluusut qinikkat aningaasarsiaannut atugaannullu tunngassuteqarput. SammisAQ soqtiginarpoq. Qanormi qinikkat atugassaqartinneqartarnersut nunamiit nunamut assigiinngiaartumik inissisimasarput. Nunat tamarmik immikkut aalajangersagaqartarpot, nunani allani atugassarititaasut aalajangersarneqaraangata pingartinneqartartut ilagivaat inuiaqatigiinni ilinniarluarsimasunut aamma sassarnissaq suleqataanissarlu kajuminartuuusariaqarmat atugassarititatigut tamanna ertariaqartoq.

Nunatsinni suut tunngavigalugit atugassarititat inissikkusuppavut? Aningaasarsiat inissisimanerat ilaatigut ilinniarluarsimasut sassarternerannut sunniuteqartartoq ilisimavarput. Ullumikkut siunissamilu politikkikkut suleqataaneq, inatsisiliortuuneq kajuminartariaqarpoq. Suliaq inuttut ilaqtariittullu inuunermut sunniuteqartuuvoq, ajunngitsunik oqimaatsunillu nassataqarluni. Taamaattumik soqtiginartipparput tunngaviusumik eqqartuinissaq, atugassarititaasut qanorittuusariaqarpat? Isumaqpugut eqqartorluarneqarsinnaasoq ilumut ullumikkut atugassarititaasut suliffinnut allanut unammillersinnaanersut.

Qaqgukkut qinigaareernermi aningaasarsiat atuutilertalernissaat eqqartorneqarsinnaavoq, tamatumani Inatsisartut Suleriaasiannut tunngasunik allanguiniarnermut ilanngullugu eqqartorneqarsinnaanissa ammaaffigaarput.

Siunnersuutilli aappaa qinikkatut atuukkunnaarnermi atugassarititaasunut tunngasumik siunnersuut isumatusaartumik inissineqartariaqarsorivarput.

Inuit ingerlaannaq atorfinitissaanissaat ajornakusoortarpoq. Politikkikkut ersarissumik isummersortarsimaneq aamma suliffissarsiornissami killileeqataasutut inissisimasarmat.

Ilinniaqqissinnaanermut piviusumik periarfissaqartariaqarput sivisuumik qinikkatut sulereerlutik

allami suliffissamik periarfissarsiorniartut. Suliffissarsiornissaq piffissaqarfingineqarsinnaaniassammat, atukkallu eqqarsaatigalugit ilaqtariit ajalusuunnginnissaat isumagineqartariaqarpoq. Taamaattumimmi atorfillit assersuutigigaanni soorunami imaaliallaannaq peersinneqarsinnaannginnerinik maleruagassaqarpugut. Taamatullu atorfillit kattuffeqarnermikkut illorsorneqarluartarput.

Politikkikut qinikkatut sulereernerme, qinigaanerup atuukkunnaarfiani maleruagassat pitsaasuuusariaqarput. Maannamut aaqqissuussineq isumaqarpugut inuit ataasiakkaat ingerlariaqqinnissaminnut periarfissarisaat atuutiinnartariaqartut.

Taamatut oqaaseqarluta siunnersuutit marluusut Inatsisartut Suleriaatsimut ataatsimiitaliaannut ingerlateqqinnejarnissaat innersuussutigaarput.